

## Bo ta Bira Loko!

Nos tur a tende e ekspreshon, “Si bo lesa Beibel, bo ta bira loko!” Ta bèrdat?

Kisas e atvertensia tin siertu valides. Tin hende ku ta saka ideanan ridíkulo for di Skritura. Ma segun mi opservashon e problema ta mas bien kon nan ta interpretá Beibel. Nota algun problema ku komprendementu ku ta guía na ideanan apsurdo.

1) Si bo bisti brel ku glas kòrá, tur kos ku bo mira lo parse kòrá. Bo no ta mira e kolónan bèrdat. Igualmente, si bo lesa Skritura ku brel ku glas kòrá—esta, ku bo punto di bista fihá promé ku bo lesa—lo bo mira tur teksto segun e perspektiva ya kaba fihá. Ma na lugá di imponé bo punto di bista riba Palabra di Dios, laga Beibel papia pa su mes.

Por ehèmpel, si bo a disidí ku fièrnu no ta eksistí (bo brel ku glas kòrá) anto kada biaha bo ta topa “fièrnu” den Skritura lo bo dedusí ku e no por ta un lugá literal di sufrimentu eterno. Ma echu ta ku hopi teksto tokante fièrnu ta indiká ku e ta un lugá bèrdat. Bo por tin otro brel bistí, p.e. un religion ku no ke pa bo lesa Skritura sin NAN brel bistí—pa bo komprendé Beibel solamente na NAN manera. **Pa komprendé Palabra di Dios korekto, kita bo brel promé. Laga Skritura papia pa su mes! Nenga imponé bo punto di bista riba Beibel.**

2) Un otro motibu hende ta dedusí tur klase di lokura for di Palabra di Dios ta pasobra nan ta lesa frasenan isolá den Beibel sin paga tino na e konteksto, loke tin skirbí promé òf despues.

Pa un hòmber disidí kiko e mester hasi, el a sera wowo, habri Beibel, pone su dede riba un teksto, habri wowo, i lesa: “el a hòrka su kurpa”. El a spanta! Esei sigur no ta bon. El a purba atrobe. E biaha aki e teksto a lesa, “abo hasi méskos”. No por ta! El a purba un biaha mas, i a lesa, “loke bo tin di hasi, hasié lihé.” Nos ta hari. Ma hopi hende ta usa Beibel na un manera similar. Nan ke proba nan kreensia usando tekstonan di Beibel ku hopi biaha no ta kuadra.

Un hende tabata ke probámi ku Dios a krea Hesus. El a usa Proverbionan 8:22: “*SEÑOR a kreami na prinsipio...*” Mi a bis’ é pa lesa henter kapitùlo 8. Ta obvio ku e teksto ta papia di sabiduria, no di Hesus. **Les a e teksto kompleto**, loke ta skirbí promé i despues, pa bo no yega na konklushonnan ridíkulo.

3) Hopi hende ke sa ku no por komprendé Beibel literal, manera e ta skirbí. Nan ta buska nifikashonnan misteriòso, sekretu, òf simboliko pa e teksto.

Kisas ora nan ta lesa di e regalonan di e sabionan, nan ta dedusí ku e sabio ku a duna oro a rekonosé Hesus komo rei, esun ku sensia a adorá Hesus komo Dios, i esun ku a dun’E mira a onr’E komo hende. E splikashon ei por ta kreativo, ma e no ta kuadra; e regalonan tabata oro, sensia, i mira literal.

Kòrda e siguiente regla bon ora bo ta lesa Beibel: **si e teksto ta komprendibel manera e ta (literal) no buska un nifikashon simbóliko**. No inventá nifikashonnan misterioso.

4) Komo Dios ta Outor di Beibel, ningun teksto ta kontradisí otro. Tin sekta ta kere ku por batisá pa defuntonan. Nan ta usa 1 Korintionan 15:29 pa probá nan kreensia. Ma tur otro teksto den Skritura ta kontradisí e kreensia ei i ta mustra kla ku kada persona ta batisá pa nan mes despues ku nan a konfia Hesus so pa salbashon. Kòrda bon ku tur teksto den Beibel ta armonisá ku otro...òf bo tambe por yega na konklushonnan ridíkulo.

Bo ta bira loko si bo lesa Beibel? Sigur hende sa saka idea straño for di Beibel. Ma si bo ta lesa Beibel korekto, lo bo bira sabí. “*Bo mandamentunan ta hasimi bira mas sabí ku mi enemigunan...mi tin mas komprendementu ku tur mi siñadónan, pasobra Bo testimonionan ta mi meditashon*” (Salmo 119:98-99). No skucha avisonan pa **no** lesa Beibel. Lesa Palabra di Dios tur dia! Ma les’ é na un manera sano. **Bo lo NO bira loko!**